

# Sakspapir

|                      |              |                   |
|----------------------|--------------|-------------------|
| <b>Saksbehandler</b> | <b>Arkiv</b> | <b>ArkivsakID</b> |
| Njål Bolstad Eidsnes | FE-223       | 21/142            |

|               |               |             |             |
|---------------|---------------|-------------|-------------|
| <b>Saksnr</b> | <b>Utvalg</b> | <b>Type</b> | <b>Dato</b> |
| 030/2021      | Kommunestyret | PS          | 17.06.2021  |

## Søknad om tilskot frå næringsfondet til prosjekt Ope landskap - beiting med geit

### Forslag til vedtak:

Modalen kommune løyver kr 30 000,- frå næringsfondet til prosjekt Ope landskap

### Saksopplysningar:

Modalen kommune v/Teknisk etat/landbruk søker om tilskot frå næringsfondet i høve gjennomføring av pilotprosjekt: Ope landskap – beiting med geit. Det vert søkt om tilskot på kr 30 000,- frå næringsfondet. Samla prosjektkostnadar er estimert til kr 60 000,-.

I vedtektene til næringsfondet står det i § 6 at fondssaker som gjeld stønad til næringslivet er det formannskapet som er næringsfondsstyre. I saker som gjeld kommunale fellestiltak er det kommunestyret som er næringsfondsstyre. Dette er eit kommunalt prosjekt og saka vert difor lagt fram for kommunestyret si avgjerd.

### Bakgrunn

Modalen kommune v/Teknisk etat/landbruk ynskjer å settje igong eit pilotprosjekt med beiterydding ved hjelp av geit og ny beiteteknologi. Kommunen ynskjer å gjennomføra pilotprosjektet i forbindelse med etablering av dagsturhytta ved Steinavatnet. Geit er godt egna til oppgåva då dei et mykje busker og kratt. Beiteryddinga vil bidra til å gjenopne og halde ved like vegetasjon rundt og langs stien. Dette vil medføra at turopplevinga vert endå betre, samt halda i hevd kulturlandskapet.

Beiting med geiter i attgrodd landskap vil også kunna gje betre beiteområde for sau på sikt, då det vil fremma veksten av beiteplantar som sauene kan nytte seg.

Geitene som er tenkt bruk i dette prosjektet er av rasa Boergeit. Boergeit er ei relativt stor, men roleg og folkekjær geit som vil bidra til å skapa mange fine turopplevingar for folk som nyttar turstien.

Arbeidsgruppa har vore i kontakt med grunneigarar i området, beitelag og Mattilsynet ang dette prosjektet, og dei var alle positive til prosjektet.

Føretaket som vert innleigd for å utføra beitinga har ansvaret for transport av dyra inn og ut av beiteområdet, tilsyn og oppfølging av dyra undervegs.

### **Vurdering**

Fjellområda i Modalen har alltid vore viktige beiteområder både for eigne bønder, men og for bønder i andre kommunar. Mange stølar er eit av særtrekka til kommunen. Dei same områda er populære turområde, både innbyggjarar og tilreisande nyttar områda til opplevingar og rekreasjon. Ferre beitedyr og endra klima gjer at mange områder no er prega av attgroing.

Attgroing fører til at det som før var lysopne beiteskogar, artsrike beitevollar eller open hei- eller engvegetasjon, får ein tett ung skog. Tett tresjikt fører igjen til at mindre lys og varme når undervegetasjonen, dette gjev sterkt redusert planteproduksjon. Tett tresjikt gjer også beitemarka vanskeleg tilgjengeleg for beitedyr. Viktige produkt frå landskapet er ikkje berre kjøt, mjølk og ull som kjem ut av beiting, men også kulturlandskap, opplevingar og biomangfald. For å ta vare på desse kvalitetane, må arealet skjøttast.

Dette pilotprosjektet prøver å svara ut denne utfordringa med å ta i bruk ny teknologi og geit som eit tiltak for å reversera attgroing. Ein del av prosjektet er å få hausta erfaring om dette kan vera eit godt verktøy i kampen mot attgroing, som ein kan gjennomføra andre stader i kommunen.

Strategisk næringsplan for Modalen 2017-2021 skal stimulera til at det er attraktivt å driva næringsaktivitet i Modalen og det er sett opp fokusområde og tiltak som skal bidra til å nå dette målet. Det er særleg to punkt som er relevant for dette prosjektet.

*Fokus: Naturressursar*

*Mål: Modalen skal utvikla bærekraftige næringar basert på lokale naturressursar.*

Legge til rette for næringar som byggjer på lokale ressursar. Auke produksjonen i landbruket gjennom aktivt samarbeid og rådgjeving med landbrukskontoret.

Aktiv støtte til verksemder som ynskjer å byggje på lokale naturressursar gjennom rådgjeving og støtte frå næringsfondet.

*Fokus: Reiseliv*

*Mål: Modalen skal utvikla eksisterande og nye reiselivsprodukt.*

Utvikla reiselivsprodukt saman med det lokale næringslivet.

Dagsturhytter er eit populært reisemål, velstelte og opne landskap med god sti vil auka attraktiviteten for området.

Mål for prosjektet med dagsturhytter er å få fleire folk ut på tur. Erfaring frå andre stader er at open og tilgjengelge turområde er populære reisemål, og at eit slikt tilbod kan trekkja til seg turistar frå nabokommunar og andre stader. Ringverknader av ein slik auka trafikk til Modalen er at det kan verta meir aktivitet på butikken, Mobryggja, Låvebakeriet, Bryggjeslottet m.m så på denne måten bidreg prosjektet til næringsutvikling i Modalen.

For landbruket er det positivt at beitekvaliteten vil auka etter at småbjørkeskog og kratt er fjerna og dermed auka produksjonen i beite for sau. Beiting aukar biologisk mangfald og karbonlagring i jord

og er difor positivt i eit bærekraft perspektiv når det gjeldt å bruka og utvikla naturressursane.

Dagens reisande etterspør, i tillegg til overnatting og bevertning, opplevingar. For eksisterande reiselivsbedrifter i Modalen vil det å kunna tilby ein godt tilrettelagt tursti fram til dagsturhytta vera positivt i høve til å styrka reiselivsproduktet sitt. Beitedyr er med å skapar trivsel i landskapet, og kan gjera turen til ei ekstra god oppleving.

I tillegg vil prosjektet vera til nytte og glede for alle innbyggjarane i Modalen som likar å ferdast i dette området.

### **Konklusjon**

Administrasjonen vil rå kommunestyret til å støtta prosjektet.

### **Kommunestyret - 030/2021**

#### **KS - behandling:**

Samrøystes vedteke

#### **KS - vedtak:**

Modalen kommune løyver kr 30 000,- frå næringsfondet til prosjekt Ope landskap

#### **Vedlegg:**

Prosjektskisse, Ope landskap - beiting med geit

Oversiktskart Ope landskap - beting med geit